

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj : 32 0 St 462098 24 St
Tuzla, 29.04.2024. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „AUTOKOMERC“ d.o.o.Gračanica, ul. Mehmeda Vehbi ef.Šemsekadića, dana 29.04.2024. godine donio je slijedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „AUTOKOMERC“ d.o.o.Gračanica, ul. Mehmeda Vehbi ef.Šemsekadića.

Za privremenog stečajnog upravnika imenuje Eldar Močić iz Gračanice, Čelikovača 44.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez

odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gračanica i Službi za geodetske i imovinsko-pravne poslove Grada Gračanica, radi upisa zabilježbe otvaranja prethodnog postupka.

Obrazloženje

„AUTOKOMERC“ d.o.o.Gračanica, ul. Mehmeda Vehbi ef.Šemsekadića, kao dužnik a putem punomoćnika Emira Mehurića advokata iz Gračanice, podnio je dana 26.03.2024. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 12.02.2024. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač „AUTOKOMERC“ d.o.o.Gračanica, ul. Mehmeda Vehbi ef.Šemsekadića, je dana 24.04.2024. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.500,00 KM.

Na osnovu priložene dokumentacije i to: potvrda NLB banke od 20.03.2024. godine, bilans stanja na dan 31.12.2023. godine, bilans uspjeha za period od 01.01.-31.12.2023. godine, dostava podataka registra ovog suda od 21.03.2024. godine i uplate predujma od 3.500,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 12.04.2024. godine, punomoćnik društva Emir Mehurić advokat iz Gračanice izjavio da je društvo poslovalo kao auto škola i ne posluje već 15-tak godina. Račun društva je ugašen 2008. godine, a drugih računa društvo nije imalo. Društvo nema zaposlenika svi su kod PU objavljeni. U sudskom registru je upisan prestanak društva 2014. godine, te je zastupnik tada mislio da je društvo prestalo sa postojanjem jer nije bio upoznat da je nužno provesti odgovarajući postupak stečaja ili likvidacije pred sudom. Obaveze društva se ne mogu sa sigurnošću u ovom trenutku utvrditi zbog neažurnosti koja je posljedica prethodno navedene okolnosti. Društvo je u zemljišnoj knjizi koja se vodi kod Općinskog suda u Gračanici upisana kao vlasnik jedne nekretnine na teritoriji Opštine Petrovo a koja se nalazi na teritoriji RS-a, i RS vodi katastarsku evidenciju za to područje i u katastru društvo nije upisano, te je teško i utvrditi koje su oznake ove nekretnine po katastru s obzirom da se ne može izvršiti usporedba po starom i novom premjeru. Na ovoj nekretnini u zemljišnoj knjizi Porezne uprava ima upisanu zakonsku hipoteku. Druge imovine društvo nema.

Iz svega navedenog proizilazi da društvo nije u mogućnosti izvršavati svoje dospjele obaveza od momenta dospelosti u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagača sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.